



## Communicaziun a las medias

Data 9.6.2021

---

# La Confederaziun ed il chantun Grischun sviluppan vinavant la promoziun dal rumantsch e dal talian

**L'Uffizi federal da cultura (UFC) ha sutscrit cun il chantun Grischun la cunvegna da prestaziun per il mantegniment e per la promoziun da la lingua e cultura rumantscha e taliana per la perioda 2021-2024. Da nov s'engascha il UFC er ordaifer il chantun Grischun per la lingua rumantscha. Il zercladur 2021 publitgescha il UFC in nov program da promoziun. Quai è in ulteriur term impurtant per la promoziun da las linguas minoritaras.**

En la nova cunvegna da prestaziun (guardar agiunta) tranter il chantun Grischun ed il UFC han la Confederaziun ed il chantun formulà la finamira da rinforzar lur collavuraziun en connex cun las mesiras per mantegnair e per promover la lingua rumantscha e taliana. La nova cunvegna da prestaziun cuntegna er la finamira da concentrar ils meds sin ils champs prioritars. Il chantun Grischun ha gia definì emprimas mesiras, per exempel en il sectur da l'educaziun e da l'administraziun. En il rom da la missiva da cultura 2021-2024 sa participescha la Confederaziun al mantegniment ed a la promoziun da las duas linguas minoritaras en il chantun Grischun cun var 22 milliuns francs.

Plinavant duain ils uffants ed ils giuvenils rumantschs ordaifer il territori tradiziunal vegnir sustegnids per emprender e per viver la lingua e la cultura – tant entaifer sco er ordaifer il chantun Grischun. Il UFC publitgescha perquai il zercladur 2021 in program da promoziun, per sustegnair projects en la «diaspora» rumantscha. Per ils onns 2021-2024 stattan a disposiziun mintgamai 400 000 francs per onn (guardar infurmaziun preliminara davart la concorrenza da projects en l'agiunta). Las emprimas rundas da project gidan ad identifitgar tge promoziun ch'è necessaria che po vegnir realisada en moda raschunaivla. Contribuziuns a projects èn previsas per exempel per purschidas da furmaziun, ma er per rinforzar la preschientscha digitala dal rumantsch, per uschia meglierar e simplifitgar l'utilisaziun da la lingua.

La promoziun da linguas da la Confederaziun sa basa en emprima lingia sin la Lescha da linguas dals 5 d'october 2007 (LLing) e sin l'Ordinaziun da linguas dals 4 da zercladur 2010 (OLing). Questas normas giuridicas implementeschan l'incumbensa constitutiva da promover las linguas naziunalas. Ellas han la finamira da rinforzar la quadrilinguitad da la Svizra, da consolidar la coesiun interna dal pajais, da promover la plurilinguitad individuala ed instituziunala sco er da mantegnair e da promover il rumantsch ed il talian.

Agiuntas:

- Cunvegna da prestaziun tranter il UFC ed il chantun Grischun, en rumantsch, en talian ed en tudestg, LINK
- Infurmaziun preliminara davart la concorrenza da projects «Diaspora rumantscha»

### **Infurmaziuns**

Clau Dermont, collavuratur scientific Linguas e statistica, Secziun cultura e societad, Uffizi federal da cultura, [clau.dermont@bak.admin.ch](mailto:clau.dermont@bak.admin.ch), +41 58 467 39 97